



Broj: 01-50-1-54-62/05
Sarajevo, 19. jula 2005.

ZAPISNIK

62. sjednice Predstavničkog doma
Parlamentarne skupštine Bosne i Hercegovine,
održane 19. jula 2005. godine

Sjednica je počela u 10,05 sati. Prisustvovalo je 36 poslanika. Opravdano su odsustvovali: Abdulah Nakaš, Vinko Zorić, Mladen Potočnik, Ibrahim Đedović, Momčilo Novaković i Elmir Jahić.

Iz Vijeća ministara BiH jednom dijelu sjednice prisustvovali su ministri: Safet Halilović, Mladen Ivanić, Bariša Čolak, Nikola Radovanović, Mirsad Kebo, Ljerka Marić i Slobodan Kovač.

Tokom rasprave o 8. tački dnevnog reda sjednici je prisustvovao visoki predstavnik za Bosnu i Hercegovinu Paddy Ashdown.

Iz međunarodnih organizacija sjednicu su pratili: Jelena Despot – OHR, Kristjan Haupt, Rodolf Oberli i Dario Šikuljak – OSCE, Mirsad Žiga – američka ambasada i Loredana Pascu – rumunska ambasada.

Kraće uvodne napomene o prijedlogu dnevnog reda i načinu rada sjednice dao je predsjedavajući Doma Šefik Džaferović.

Prijedloge o dopuni dnevnog reda iznijeli su Zlatko Lagumdžija i Jozo Križanović.

Povodom prijedloga Zlatka Lagumdžije da se u dnevni red uvrste pitanja socijalnih programa, u vezi s uvođenjem PDV-a, diskutirali su: Beriz Belkić, Dušanka Majkić i Ljiljana Milićević.

Petar Kunić iznio je problem rada komisije kojoj predsjedava, jer nekoliko puta nije mogao održati sjednicu zbog nedolaska članova Komisije. Zatražio je od predsjedavajućeg da pozove poslanike da prisustvuju sjednicama komisija.

Predsjedavajući Doma je, povodom upozorenja Petra Kunića, rekao da su gotovo svi poslanici profesionalci u Domu i da bi trebalo da im taj posao bude na prvom mjestu. Naglasio je da je ovo prilika da Administrativna komisija sagleda pitanje odnosa poslanika prema radu u komisijama i pokuša uvesti odgovarajuće mjere odgovornosti za one koji neopravdano izostaju sa sjednica komisija.

U vezi s prijedlozima Zlatka Lagumdžije, predsjedavajući je upoznao poslanike o stavovima Kolegija i Proširenog kolegija, da se sačeka izvještaj nadležne komisije o materijalima koji su vezani za socijalne programe, jer se oni nalaze u komisijskoj fazi kao i svi drugi materijali. Naglasio je da će naredna sjednica Doma biti održana 27. jula i da će se tada na dnevnom redu naći rasprava o ovim pitanjima. Pitao je Lagumdžiju da li i nakon ovog objašnjenja ostaje kod svojih prijedloga.

Zlatko Lagumdžija ostao je kod prijedloga i zatražio da se Dom o njima izjasni.

Predsjedavajući je zatim dao na glasanje prijedloge o dopuni dnevnog reda.

Prvo se Dom izjasnio o prijedlogu Zlatka Lagumdžije – da se u dnevni red uvrsti Nacrt socijalnih programa za ublažavanje posljedica poskupljenja osnovnih životnih namirnica zbog uvođenja PDV-a.

Za prijedlog je glasalo 14, protiv 15....

Za prijedlog Zlatka Lagumdžije – Plan aktivnosti koje proizilaze iz efekata i procjene uvođenja tarifnih kvota – glasalo je 10 poslanika, 17 je bilo protiv a šest se suzdržalo.

Za prijedlog da se u dnevni red uvrsti Stanje trgovinskog deficita i mjere za njegovo smanjenje – glasalo je 11 poslanika, 16 je bilo protiv a osam se suzdržalo.

Za prijedlog da se razmatraju efekti privremene suspenzije dijela sporazuma o slobodnoj trgovini s Republikom Hrvatskom i Srbijom i Crnom Gorom glasalo je 12 poslanika, 15 je bilo protiv a osam se suzdržalo.

Prema tome, navedeni prijedlozi o dopuni dnevnog reda nisu usvojeni.

Predsjedavajući je na glasanje dao drugi prijedlog Zlatka Lagumdžije – da se u dnevni red uvrsti informacija Vijeća ministara BiH o izdavanju pasoša, registarskih tablica za automobile, s prijedlogom aktivnosti za rješavanje ovog problema i utvrđivanje odgovornosti za nastalo stanje.

Za ovaj prijedlog glasala su 23 poslanika, šest je glasalo protiv, četiri su se suzdržala.

Predsjedavajući je konstatirao da je ovaj prijedlog usvojen.

Na kraju, predsjedavajući je dao na glasanje prijedlog Joze Križanovića da se 8. tačka preformulira tako da glasi: Prijedlog rezolucije o odnosu institucija BiH prema mandatu visokog predstavnika, sa Zaključcima Komisije za vanjske poslove...»

Ovaj prijedlog nije usvojen. Za je glasalo devet, protiv 18, suzdržalo se osam poslanika.

Predsjedavajući je konstatirao da je za 62. sjednicu Predstavničkog doma usvojen sljedeći

DNEVNI RED

1. Usvajanje zapisnika 59., 60. i 61. sjednice Predstavničkog doma;
2. Poslanička pitanja i odgovori;
3. Zahtjev poslanika Milorada Živkovića za razmatranje Prijedloga zakona o izmjenama i dopunama Izbornog zakona Bosne i Hercegovine po hitnom postupku, u skladu s članom 105. Poslovnika,
4. Prijedlog poslovnika Predstavničkog doma Parlamentarne skupštine BiH (prvo čitanje);
5. Prijedlog zakona o zaštiti tajnih podataka (prvo čitanje)
- predlagatelj: Zajednička sigurnosno-obavještajna komisija;
6. Prijedlog zakona o osnovama sigurnosti saobraćaja na putevima (prvo čitanje);
7. Izvještaj Zajedničke komisije oba doma o nastojanju za postizanje sporazuma o usaglašavanju teksta Zakona o Službi za poslove sa strancima;
8. Zaključci Komisije za vanjske poslove Predstavničkog doma o temi: "Odnos institucija BiH prema mandatu visokog predstavnika međunarodne zajednice u Bosni i Hercegovini";
9. Davanje saglasnosti za ratifikaciju:
- Kreditnog i finansijskog sporazuma između Kreditanstalt für Wiederaufbau Frankfurt am Main (KfW) i Bosne i Hercegovine, Federacije Bosne i Hercegovine i Republike Srpske – Sanacija gradskog vodovoda u unsko-sanskoj regiji i
10. Informacija Vijeća ministara BiH o izdavanju pasoša i registarskih tablica za automobile, s prijedlogom aktivnosti za rješavanje ovoga problema i utvrđivanje odgovornosti za nastalo stanje.

Ad – 1: Usvajanje zapisnika 59., 60. i 61. sjednice Predstavničkog doma

Ljiljana Milićević prigovorila je da u zapisnicima 60. i 59. sjednice imaju greške tehničke prirode, tj. da piše da je 60. sjednica održana nakon završetka 29. umjesto 59. sjednice i da se u Zapisniku 59. sjednice ne slaže broj prisutnih i odsutnih poslanika s ukupnim brojem poslanika u Predstavničkom domu.

S ovom primjedbom jednoglasno su usvojeni zapisnici 59., 60. i 61. sjednice Doma, s tim da se glasalo posebno o svakom zapisniku.

Ad – 2: Poslanička pitanja i odgovori

Predsjedavajući Doma konstatirao je da su odgovore na pitanja dobili Azra Hadžiahmetović, Sead Avdić, Muhamed Moranjkić, Selim Bešliagić, Mehmed Suljkanović, Ivo Lozančić, Nikola Špirić, Mirsad Ćeman i Seada Palavrić.

Odgovore na pitanja komentarisali su Mirsad Ćeman, Muhamed Moranjkić, Ivo Lozančić, Petar Kunić i Selim Bešliagić.

Postavljena su poslanička pitanja kako slijedi:

Seada Palavrić:

«U centralnoj emisiji FTV «Dnevnik 2» , emitiranoj 18.7.2005., s početkom u 19,30 sati, informacija o Izvještaju Komisije za reformu odbrane (kao rezultat šestomjesečnog rada) emitirana je u drugom dijelu Dnevnika, dok su svi drugi elektronski mediji svoje informativne emisije počeli događajima dana, tj. Izvještajem o reformi odbrane. Nasuprot ovome, FTV je u prvim minutama istog dnevnika javnost upoznala s pismom predsjednika SDP-a upućenim predsjedavajućem Predstavničkog doma Parlamentarne skupštine BiH i Vijeću ministara BiH, koji bi i za FTV trebalo da bude jedan od 57 jednakih članova PSBiH.

Tražim od RAK-a da procijeni da li je ovakvim postupkom FTV ispunila svoju obavezu pravovremenog i nepristrasnog informiranja i druge uslove koje kao javni elektronski medij mora ispuniti. Ukoliko nije, očekujem od RAK-a da ovakve kontinuirane promašaje FTV adekvatno sankcionira .»

Muhamed Moranjkić:

1.« Dana 24.3.2005. podnio sam interpelaciju u vezi s donošenjem zakona kojima se regulira sadržaj i djelokrug Administrativne komisije, s obzirom da se u posljednja dva izvještaja Revizije ukazuje na te nedostatke.... Pitanje: **Kada će ti zakoni doći u parlamentarnu proceduru, jer je prošlo 75 dana a zakona nema ni na pomolu? Tražim HITAN odgovor.**»

2. «Ovom domu poznato je da sam dva do tri puta podnosio prijedloge i inicijative za izmjenu Izbornog zakona po nekoliko osnova... Koncem maja mjeseca ove godine Domu se obratila Izborna komisija BiH informacijom koju ja shvatam i kao inicijativu za razmatranje uvođenja sistema pasivne registracije birača BiH. Pitanje: **Šta je s ovom informacijom i inicijativom i zašto se taj problem ne postavlja pred ovaj dom da ne bude kasno pred izbore, kako se obično odgovaralo meni, iako sam se javljao najmanje pola godine prije izbora?**»

Mehmed Suljkanović:

«Tražim da Vijeće ministara BiH dostavi izvještaj Predstavničkom domu o stanju na izradi planersko-studijske dokumentacije za autput na Koridoru 5c. Ovo bi se uklopilo u obavezu Vijeća ministara BiH da informira Parlament svaka tri mjeseca o autoputu na Koridoru 5c.»

Beriz Belkić:

1. «Hoće li Vijeće ministara BiH reagirati na «Posljednji apel» Asocijacije inovatora BiH? Značaj djelatnosti kojom se bave ljudi okupljeni oko Saveza ne treba objašnjavati.»

2. «Razmišlja li Vijeće ministara BiH voditi aktivnosti na ispitivanju mogućnosti uvođenja poreskih olakšica mladim ljudima pri prvoj kupovini stana? Stambeni problem jedan je od razloga odlaska mladih iz BiH. Primjer - Hrvatska: U Zakonu o porezu na promet nekretnina iz 2003. osobe

do 40 godina oslobođene su plaćanja poreza pri prvoj kupovini stana (do iznosa određene kvadrature i po zakonu utvrđenim uslovima). Nemojte mi samo odgovoriti da niste nadležni!»

Jozo Križanović:

«Prijedlog rezolucije o odnosu institucija BiH prema mandatu i imenovanju novog visokog predstavnika međunarodne zajednice Klub SDP-a BiH uputio je, 10.3.2005., u Predstavnički dom PSBiH Pitam Kolegij Predstavničkog doma – hoće li i kada ovaj prijedlog rezolucije biti uvršten u dnevni red Predstavničkog doma?»

Izet Hadžić:

1.«Zašto se Sporazum između Vijeća ministara BiH i Vlade Republike Italije o uzajamnom reguliranju međunarodnog drumskog prijevoza putnika i tereta zadržava ovako dugo u pripremi za ratifikaciju (2,5 godine) i koje je štete proizveo u međunarodnom transportu, kao i ko je zadržao ovaj dokument?»

2. «Šta je sa sličnim sporazumima s Austrijom i Mađarskom?»

Ivo Lozančić:

«Moje pitanje je za tri elektroprivrede - šta preduzimaju u smislu izgradnje novih elektroenergetskih objekata, modernizacije postojećih i korištenja nekih drugih izvora energije? Postoji li strategija o tome na nivou BiH?»

Ljiljana Milićević:

«Kakva je sudbina, tj. šta je Vijeće ministara BiH preduzelo, ko su nosioci aktivnosti o pitanju izvještaja CPT (Evropski komitet za prevenciju torture i nehumanog ponašanja)? Poznato je da je CPT prošle godine boravio u BiH, posjećen je zenički zatvor (na osnovu pritužbi). Napokon, možemo li kao poslanici dobiti taj izvještaj?»

Zlatko Lagumdžija:

«Misli li i kada će Vijeće ministara BiH educirati poslanika vladajuće većine, kao što je gospođa Palavrić, da ne postavlja nesuvisla pitanja koja proizilaze iz totalnog nepoznavanja principa demokratskih institucija javnih servisa (za što je najbolji primjer njeno današnje pitanje) o Federalnoj televiziji, iz kojeg se vidi da ona nema veze s mandatom RAK-a i vodi se uskostranačkim i ličnim frustracijama zbog toga što Javni servis nije privatni ili stranački?»

Sead Avdić:

«Tražim da stranke parlamentarne većine u pisanoj formi dostave poslanicima u Predstavničkom domu PSBiH politički program na kojem će djelovati do kraja mandata, posebno s aspekata: reforme policije; dinamike uključivanja u evropske integracije i evroatlantske asocijacije, tj. uključenje u Partnerstvo za mir, Zakona o visokom obrazovanju i Zakona o javnom RTV sistemu. U slučaju da parlamentarna većina nema ovakav dokument, odgovor tražim od Vijeća ministara BiH.

Ruža Sopta:

«Koliko je u 2004. u BiH uloženo u informatizaciju škola (posebno iz budžeta, a posebno iz drugih izvora), a koliko je u budžetima za 2005. predviđeno za tu investiciju?»

Ad – 3: Zahtjev poslanika Milorada Živkovića za razmatranje Prijedloga zakona o izmjenama i dopunama Izbornog zakona Bosne i Hercegovine po hitnom postupku, u skladu s članom 105. Poslovnika

Milorad Živković kratko je obrazložio zahtjev za hitni postupak.

Nije bilo rasprave pa je predsjedavajući zahtjev za hitni postupak dao na glasanje.

Za je glasalo pet, protiv 14, suzdržala su se četiri poslanika. Prema tome, zahtjev nije usvojen i Prijedlog zakona o izmjenama i dopunama Izbornog zakona BiH razmatrat će se u redovnoj proceduri.

Ad – 4: Prijedlog poslovnika Predstavničkog doma Parlamentarne skupštine Bosne i Hercegovine (prvo čitanje)

U ime nadležne Ustavno-pravne komisije govorio je Mirsad Ćeman.

O ovoj tački nije bilo rasprave.

Dom je jednoglasno usvojio Prijedlog poslovnika Predstavničkog doma u prvom čitanju.

Predsjedavajući je predložio da se Prijedlog poslovnika razmatra i u drugom čitanju.

Prijedlog je usvojen jednoglasno.

U drugom čitanju također nije bilo rasprave.

S 31 glasom za, jednim protiv i jednim suzdržanim usvojen je Poslovnik Predstavničkog

Ad – 5: Prijedlog zakona o zaštiti tajnih podataka (prvo čitanje)

- predlažać: Zajednička sigurnosno-obavještajna komisija

O ovoj tački nije bilo rasprave. Prijedlog zakona usvojen je jednoglasno u prvom čitanju.

Jednoglasno je usvojen i prijedlog predsjedavajućeg da se Prijedlog zakona razmatra i u drugom čitanju.

Ni u drugom čitanju također nije bilo rasprave.

Dom je jednoglasno (prisutna 33 poslanika) usvojio Zakon o zaštiti tajnih podataka.

Ad – 6: Prijedlog zakona o osnovama sigurnosti saobraćaja na putevima (prvo čitanje)

U uvodnim napomenama predsjedavajući je, pored ostalog, rekao da je nadležna komisija dostavila Izvještaj da je na Prijedlog zakona usvojila 77 amandmana, a da su u plenarnoj fazi amandmane podnijeli Mirsad Ćeman, Adem Huskić i Milorad Živković.

U raspravi o Prijedlogu zakona Dušanka Majkić iznijela je više primjedbi.

U ime Komisije za saobraćaj i komunikacije Miloš Jovanović je, pored ostalog, rekao da je Komisija uložila zaista mnogo truda i vremena za razmatranje Prijedloga zakona i da je o njemu provedena i Javna rasprava. Napomenuo je da je Komisija pripremila cjelovit tekst zakona u koji su ugrađeni usvojeni amandmani. Dalje je rekao da je dobio obavještenje od jednog broja poslanika da nisu imali dovoljno vremena pogledati ovaj cjeloviti tekst Prijedloga zakona, pa je predložio da se omogućiti podnošenje novih amandmana do 22. jula.

U raspravi su učestvovali: Beriz Belkić, Milorad Živković i Dušanka Majkić. U ime predlažaća, govorio je sekretar Ministarstva za promet i komunikacije Nikola Šego.

Nakon rasprave, predsjedavajući je dao na glasanje Prijedlog zakona u prvom čitanju.

Za je glasalo 30, protiv jedan, a suzdržala su se četiri poslanika.

Predsjedavajući je konstatirao da je Prijedlog zakona o sigurnosti saobraćaja na putevima usvojen u prvom čitanju.

Na prijedlog predsjedavajućeg nadležne komisije Miloša Jovanovića, **Dom je usvojio zaključak da se omogućiti podnošenje novih amandmana zaključno sa 22. julom 2005., nakon čega će nadležna komisija dostaviti dopunski izvještaj o novim amandmanima.**

Ad – 7: Izvještaj Zajedničke komisije oba doma o nastojanju za postizanje sporazuma o usaglašavanju teksta

Zakona o Službi za poslove sa strancima

O Izvještaju Komisije nije bilo rasprave.

Izvještaj je usvojen jednoglasno.

Predsjedavajući je konstatirao da je definitivno usvojen Zakon o Službi za poslove sa strancima u tekstu kako ga je usaglasila Zajednička komisija.

Ad – 8: Zaključci Komisije za vanjske poslove Predstavničkog doma o temi: "Odnos institucija BiH

prema mandatu visokog predstavnika međunarodne zajednice u Bosni i Hercegovini"

Tokom rasprave o ovoj tački dnevnog reda sjednici je prisustvovao visoki predstavnik u Bosnu i Hercegovini Paddy Ashdown.

U uvodnim napomenama predsjedavajući Doma Šefik Džaferović je, između ostalog, rekao da je Kolegij usaglasio način rada po ovoj tački, tako što će predsjedavajući Komisije za vanjske poslove Martin Raguž podnijeti Domu uvodno izlaganje o prijedlogu zaključaka, a zatim će se Domu obratiti visoki predstavnik. Nakon izlaganja visokog predstavnika, bit će otvorena rasprava.

Martin Raguž podnio je uvodno izlaganje, a zatim se Domu obratio visoki predstavnik Paddy Ashdown.

Nakon ovih izlaganja vođena je duža rasprava u kojoj su učestvovali: Nijaz Duraković, Zlatko Lagumdžija, Sead Avdić, Dušanka Majkić, Tihomir Gligorić, Miloš Jovanović, Selim Bešlić, Šefik Džaferović, Petar Kunić, Muhamed Moranjkić, Ljiljana Milićević, Ruža Sopta, Filip Andrić, Mirsad Ćeman, Seada Palavrić, Senija Kapetanović i ministar vanjskih poslova Mladen Ivanić.

Na pitanja iz rasprave odgovorio je visoki predstavnik Paddy Ashdown.

Nakon rasprave, predsjedavajući Doma predložio je sljedeći zaključak:

1. Materijal Komisije za vanjske poslove dobra je osnova za rješavanje pitanja koje se tiče odnosa institucija BiH prema mandatu visokog predstavnika međunarodne zajednice u Bosni i Hercegovini.

2. Zadužuje se Komisija za vanjske poslove da Domu podnese na usvajanje tekst zaključaka, imajući u vidu raspravu koja je na ovoj sjednici vođena, kao i izlaganje visokog predstavnika.

Zaključak je usvojen 30 glasova za, jednim protiv i dva suzdržana.

Ad – 9: Davanje saglasnosti za ratifikaciju Kreditnog i finansijskog sporazuma između Kreditanstalt für

Wiederaufbau Frankfurt am Main (KfW) i Bosne i Hercegovine, Federacije Bosne i Hercegovine

i Republike Srpske – Sanacija gradskog vodovoda u unsko-sanskoj regiji

Nije bilo rasprave o ovoj tački dnevnog reda. Dom je dao saglasnost za ratifikaciju ovog sporazuma.

Ad – 10: Informacija Vijeća ministara BiH o izdavanju pasoša i registarskih tablica za automobile, s prijedlogom aktivnosti za rješavanje ovog problema i utvrđivanje odgovornosti za nastalo stanje

Predsjedavajući Džaferović obavijestio je poslanike da je na pauzi obaviješten iz kabineta ministra civilnih poslova da je ministar danas u Banjoj Luci na sastanku o obrazovanju te da zbog toga ne prisustvuje sjednici kako bi podnio informaciju, ali da je sjednici prisutan pomoćnik

ministra Miodrag Pandurević koji je ovlašten da, ako to Dom prihvati, podnese informaciju u vezi s ovom tačkom dnevnog reda.

U raspravi su učestvovali: Zlatko Lagumdžija, Beriz Belkić, Seada Palavrić i Tihomir Gligorić.

Zlatko Lagumdžija nije se saglasio da pomoćnik ministra podnese informaciju, naglasivši da nije bitno Domu podnijeti informaciju samo iz jednog segmenta, već da sjednici treba prisustvovati neko kome će poslanici postavljati i pitanja. Zato je predložio da Dom usvoji zaključak kojim će se zadužiti Vijeće ministara da u roku od sedam dana riješi nastale probleme i izađe pred Parlament s odgovarajućom informacijom i planom aktivnosti za sistematsko rješavanje pitanja pasoša, registarskih tablica i pratećih dokumenata, uz informaciju o sankcioniranju odgovornih zbog nastalog stanja.

Beriz Belkić, Seada Palavrić i Tihomir Gligorić založili su se da pomoćnik ministra informira Dom o pitanjima iz ove tačke dnevnog reda.

Pomoćnik ministra civilnih poslova podnio je Domu informaciju, a zatim je diskutirao Zlatko Lagumdžija.

Nakon rasprave, predsjedavajući je prvo na glasanje dao prijedlog zaključka koji je podnio Zlatko Lagumdžija. Stavljajući prijedlog zaključka na glasanje, predsjedavajući je rekao da Parlament, bez odgovarajuće informacije Vijeća ministara BiH, ne bi trebalo da prejudicira neke stvari, pa je iznio svoj prijedlog zaključka – da Predstavnički dom zadužuje Vijeće ministara BiH da, u roku od sedam dana, Domu dostavi informaciju o aktuelnim problemima obrazaca za pasoše i registarske tablice za automobile.

Za prijedlog zaključka Zlatka Lagumdžije glasalo je pet, protiv 13, suzdržalo se sedam poslanika. Prema tome, Prijedlog nije usvojen.

Sa 19 glasova za, šest protiv i jednim suzdržanim usvojen je Zaključak koji je predložio predsjedavajući Džaferović, a koji glasi:

Predstavnički dom Parlamentarne skupštine BiH zahtijeva od Vijeća ministara BiH da, u roku od sedam dana, Domu dostavi informaciju u vezi s aktuelnim problemom obrazaca za izdavanje pasoša i registarskih tablica za automobile.

Ovim je realiziran dnevni red 62. sjednice.

Zaključujući sjednicu, predsjedavajući je obavijestio poslanike da je Kolegij odlučio da se 63. sjednica održi 27. jula, na kojoj će se razmatrati sve što bude spremno za razmatranje. Godišnji odmor koristit će se od 1. do 20. augusta, a poslanici treba Sekretarijatu da ostave adrese i telefone kako bi ih, u slučaju potrebe, mogli kontaktirati.

Sjednica je završena u 16,37 sati.

Sastavni dio Zapisnika je transkript 62. sjednice Doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Šefik Džaferović